



岳忠武王集

全

^ 16  
2612

集王武忠岳







16  
2612

文夕癸亥季替鐫

# 岳忠武王集

江都正巖堂棊版



518  
岳忠武王集



王黼玉蠲堂集序



岳忠武王集

文天祥李燾

宋岳忠武集序

有非常之君然後有非常之  
功雖有其人無其君則冤抑  
貶竄齎憤於九泉者何限焉  
就其迹而論之與徒罹奇禍  
無益於其君何若脫然高蹈



之爲愈也、然而其奮不顧身者、至誠忠愛、不忍措宗社於傾殆、淪生靈於被左也、而千古冤枉之痛、莫若宋岳忠武、忠武忠孝大節、智勇蓋世、議論正確、天下之所屬望、而金

虜之所尤畏也、苟使高宗一意專任、無掣之、則黃龍痛飲、旣足褫黠虜之膽、以張恢復之勢、而其唾手燕雲、復故地、迎二主、以雪累世之耻、快天下之心、亦可期也、而秦檜以



岳忠武王集  
大臣陰與虜結、恐忠武不死、  
梗和議、禍及己身、百方構扇、  
高宗闇情、終陷其術中、誣以  
三字、而不能遂中興之業、可  
勝慨乎、夫忠武料敵如神、顧  
一身之去就、豈不審之哉、而

議者或惜奉牌班師、蓋非通  
論也、自此大勢益去、版宇日  
蹙、終至使堯舜文明之域、爲  
胡羯腥膻之地、實千載之遺  
憾、志士仁人之所切齒扼腕  
也、玉巖堂將刻其集、謁余序、



余既希慕其人而深有感於  
其文故書平生所慨而還之  
嗚呼趙宋以和誤國後之為  
趙宋者宜深鑒也矣文久辛  
酉冬日常陸寺門謹序

精昔爽謝奉微風响蓋表風

岳忠武王生像



采石安遠拜寫



運用之妙孝乎一心  
惟此兩言超出古今

岳武穆贊

賴襄

石鼎  

岳忠武王小傳

宋史本傳世已有刊本故今舉其概略

岳飛字鵬舉相州湯陰人少負氣節家貧力學尤好左氏春秋孫吳兵法生有神力未冠挽弓三百斤弩八石宋建炎紹興間奉詔討金虜平流賊用兵如神所向無前中原響應浸浸乎有恢復之勢時秦檜為相專主講和欲畫淮以北棄之金將兀朮遺檜書曰汝朝夕以和請而岳飛方為河北圖必殺飛始可和檜亦以飛不死終梗和議已必及禍百方誣陷遂逮飛下獄死年三十九官至少保樞密副使淳熙六年謚武穆後追封鄂王飛初隸留守宗澤大奇之曰爾



岳忠武王集  
勇智才藝古良將不能過然好野戰非萬全計因授以陣圖飛曰陣而後戰兵法之常運用之妙存乎一心事親孝家無姬侍吳玠素服飛願與交驩節名姝遺之飛曰主上宵旰豈大將安樂時邪却不受玠益敬服帝欲爲飛營第飛辭曰金虜未滅何以家爲或問天下何時太平飛曰文臣不愛錢武臣不惜死天下太平矣卒有取民一縷以束芻者立斬以徇卒夜宿民開門願納無敢入者軍號凍死不拆屋餓死不鹵掠卒有疾飛爲調藥凡有犒賞秋毫不私善以少擊衆嘗以八百人破群盜王善等五十萬衆於南薰

門以八千人破曹成十萬衆於桂嶺其戰兀朮於順昌則以背嵬八百於朱仙鎮則以五百皆破其衆十餘萬凡有所舉盡召諸統制與謀謀定而後戰故有勝無敗猝遇敵不動故敵爲之語曰撼山易撼岳家軍難張俊嘗問用兵之術飛曰仁信智勇嚴闕一不可飛好賢禮士覽經史雅歌投壺恂恂如書生每辭官必曰將士效力飛何功之有然忠憤激烈議論持正不挫於人卒以此得禍







之憂雖小朝廷奚可得斯皆帝意中事檜遂建議逢  
合忍輕社稷蠟書徒馳竟成三字之獄由今觀之卽  
其說豈盡誣耶迨乎鍛鍊旣成從容就義韓何寃之  
而弗聞於上三大理士儻劉允升諸君子訟其寃而  
主弗察王雖志抱餘憾乎假令王不奉班師之詔僥  
倖成功有如後之妄議者王以爲憾乃滋甚故勿爲  
耳王一死誠可無憾惟宋室偏安卒至版宇日蹙中  
華淪喪而莫可如何此仁人志士讀其書論其世所  
爲太息於陰陽小大之間而徬徨天人之際也王少  
力學好左氏春秋有關漢壽風漢壽自一二牋牘外

撰著罕傳而王所爲表劄詩記沈摯壯涼能自寫浩  
然之氣又與武侯出師二篇相上下余故採程史諸  
書所載哀次錄存之庸繫千百載忠孝仰止之懷他  
若遺言佚事雜見於金陀粹篇及精忠諸錄率多瑣  
複又後賢憑弔之作竊嫌掛漏並缺不存觀者尚毋  
嗤其未備云時崇禎十一年戊寅人日單恂題於東  
臯之白燕庵



岳忠武王集目錄  
卷之十一 平定西人日軍出關  
卷之十二 岳忠武王集目錄  
卷之十三 岳忠武王集目錄  
卷之十四 岳忠武王集目錄  
卷之十五 岳忠武王集目錄  
卷之十六 岳忠武王集目錄  
卷之十七 岳忠武王集目錄  
卷之十八 岳忠武王集目錄  
卷之十九 岳忠武王集目錄  
卷之二十 岳忠武王集目錄  
卷之二十一 岳忠武王集目錄  
卷之二十二 岳忠武王集目錄  
卷之二十三 岳忠武王集目錄  
卷之二十四 岳忠武王集目錄  
卷之二十五 岳忠武王集目錄  
卷之二十六 岳忠武王集目錄  
卷之二十七 岳忠武王集目錄  
卷之二十八 岳忠武王集目錄  
卷之二十九 岳忠武王集目錄  
卷之三十 岳忠武王集目錄  
卷之三十一 岳忠武王集目錄  
卷之三十二 岳忠武王集目錄  
卷之三十三 岳忠武王集目錄  
卷之三十四 岳忠武王集目錄  
卷之三十五 岳忠武王集目錄  
卷之三十六 岳忠武王集目錄  
卷之三十七 岳忠武王集目錄  
卷之三十八 岳忠武王集目錄  
卷之三十九 岳忠武王集目錄  
卷之四十 岳忠武王集目錄  
卷之四十一 岳忠武王集目錄  
卷之四十二 岳忠武王集目錄  
卷之四十三 岳忠武王集目錄  
卷之四十四 岳忠武王集目錄  
卷之四十五 岳忠武王集目錄  
卷之四十六 岳忠武王集目錄  
卷之四十七 岳忠武王集目錄  
卷之四十八 岳忠武王集目錄  
卷之四十九 岳忠武王集目錄  
卷之五十 岳忠武王集目錄  
卷之五十一 岳忠武王集目錄  
卷之五十二 岳忠武王集目錄  
卷之五十三 岳忠武王集目錄  
卷之五十四 岳忠武王集目錄  
卷之五十五 岳忠武王集目錄  
卷之五十六 岳忠武王集目錄  
卷之五十七 岳忠武王集目錄  
卷之五十八 岳忠武王集目錄  
卷之五十九 岳忠武王集目錄  
卷之六十 岳忠武王集目錄  
卷之六十一 岳忠武王集目錄  
卷之六十二 岳忠武王集目錄  
卷之六十三 岳忠武王集目錄  
卷之六十四 岳忠武王集目錄  
卷之六十五 岳忠武王集目錄  
卷之六十六 岳忠武王集目錄  
卷之六十七 岳忠武王集目錄  
卷之六十八 岳忠武王集目錄  
卷之六十九 岳忠武王集目錄  
卷之七十 岳忠武王集目錄  
卷之七十一 岳忠武王集目錄  
卷之七十二 岳忠武王集目錄  
卷之七十三 岳忠武王集目錄  
卷之七十四 岳忠武王集目錄  
卷之七十五 岳忠武王集目錄  
卷之七十六 岳忠武王集目錄  
卷之七十七 岳忠武王集目錄  
卷之七十八 岳忠武王集目錄  
卷之七十九 岳忠武王集目錄  
卷之八十 岳忠武王集目錄  
卷之八十一 岳忠武王集目錄  
卷之八十二 岳忠武王集目錄  
卷之八十三 岳忠武王集目錄  
卷之八十四 岳忠武王集目錄  
卷之八十五 岳忠武王集目錄  
卷之八十六 岳忠武王集目錄  
卷之八十七 岳忠武王集目錄  
卷之八十八 岳忠武王集目錄  
卷之八十九 岳忠武王集目錄  
卷之九十 岳忠武王集目錄  
卷之九十一 岳忠武王集目錄  
卷之九十二 岳忠武王集目錄  
卷之九十三 岳忠武王集目錄  
卷之九十四 岳忠武王集目錄  
卷之九十五 岳忠武王集目錄  
卷之九十六 岳忠武王集目錄  
卷之九十七 岳忠武王集目錄  
卷之九十八 岳忠武王集目錄  
卷之九十九 岳忠武王集目錄  
卷之一百 岳忠武王集目錄



岳忠武王集目次

南京上高宗書畧

招曹成不服乞進兵劄

乞復襄陽劄

畫守襄陽等郡劄畧

乞出師劄

乞本軍進討劉豫劄

乞進屯淮甸劄

乞乘機進兵劄

乞移都奏畧



論虜情奏畧

乞定儲嗣奏畧

乞止班師詔奏

乞以明堂恩補張所男宗本奏

辭鎮南軍承宣使第二奏

乞侍親疾劄

辭建節第四劄

乞終制劄

辭開府劄子貼黃

辭開府第三劄

辭開府第四劄

辭宣撫副使劄

乞解軍務第二劄

辭男雲特轉三官劄

辭男雲轉三官第二劄

辭男雲特轉恩命劄

辭男雲特轉恩命第二劄

辭少保第三劄

辭少保第四劄

辭少保第五劄



辭男雲除御帶第二劄

乞叙立王次翁下第二劄

乞解樞柄第三劄

辭除兩鎮充萬壽觀使第四劄

謝講和赦表

奉詔移偽齊檄

御書屯田三事跋

申劉光世乞進兵狀

申劉光世乞兵馬糧食狀

五嶽祠盟

題廣德軍金沙寺壁

題東松寺

題永州祁陽縣大營驛

題鄱陽魏石山寺

從駕遊西內應制

送紫巖張先生北伐

翠光亭

題翠巖寺

寄浮圖慧海

池州翠微亭



題新淦蕭寺壁

金山寺

滿江紅

小重山

岳忠武王集目次終

岳忠武王集

南京上高宗書畧

明 單恂 錄

陛下已登大寶，黎元有歸，社稷有主，已足以伐虜人之謀，而勤王御營之師日集，兵勢漸盛，彼方謂我素弱，未必能敵，正宜乘其怠而擊之，而黃潛善、汪伯彥輩不能承陛下之意，恢復故疆，迎還二聖，奉車駕日益南，又令臨安、維揚、襄陽、淮備巡幸，有苟安之漸，無遠大之畧，恐不足以係中原之望，雖使將師之臣戮力於外，終亡成功，為今之計，莫若車駕還京，罷二州



巡幸之詔乘一聖蒙塵未久虜穴未固之際親將六軍迤邐北渡則天威所臨將帥一心士卒作氣中原之地指期可復

招曹成不服乞進兵劄

竊惟內寇不除何以攘外近郊多壘何以服遠比年群盜競作朝廷務廣德意多命招安故盜亦玩威不畏力強則肆暴力屈則就招苟不畧加勦除蠶起之衆未可遽殄臣昨者被奉曹成之命深以爲陛下好生之意如此爲臣子者患不能推廣而行之故先宣布上恩以期改行閱日雖久扞格是聞臣常累遣探

報知其賊馬已離道州進趨廣西此寇所爲未肯遽屈意欲侵犯一廣肆毒生靈俟其力盡勢殫然後徐爲服降之計臣今進發自郴州桂陽監以往卽行措置用兵掩殺速除蕩以綏彼民

乞復襄陽劄

竊惟善觀敵者當逆其所始善制敵者當先去其所恃今外有北虜之寇攘內有楊么之竊發俱爲大患上軫宸襟然以臣觀之楊么雖近爲腹心之憂其實外假李成以爲唇齒之援今日之事正當進兵襄陽先取六郡李成不就繫縛則亦喪師遠逃於是加



兵湖湘以殄群盜要不爲難而况襄陽六郡地爲險要恢復中原此爲基本臣今已厲兵飾士惟俟報可指期北向伏乞睿斷速賜施行庶幾上流早見平定中興之功次第而致不勝天下之幸取進止

畫守襄陽等郡劄略

陛下欲駐大兵于鄂州則襄陽隨郢量留軍馬又于安復漢陽亦量駐兵兵勢相援漕運相繼荆門荆南聲援亦已相接江淮荆湖皆可奠安六州之屯且以正兵六萬爲固守之計就撥江西湖南糧斛朝廷支降券錢爲一年支遣候營田就緒軍儲旣成則朝廷

無餽餉之憂進攻退守皆兼利也惟是葺治之初未免艱難必仰朝廷微有以資之基本旣立後之利源無有窮已又此地夏秋則江水漲隔外可以禦寇內足以運糧至冬後春初江水淺澁吾資糧已備可以坐待矣於今所見在乎速備糧食斟量屯守之兵可善其後臣識闇不學輒具管見仰報聖問辭拙事直伏乞聖慈裁決

乞出師劄

臣伏白國家變故以來起於白屋實懷拍軀報國復讐雪耻之心幸憑社稷威靈前後粗立薄効而陛下



錄臣微勞擢自布衣曾未十年官至大尉品秩比三公恩數視二府又增重使名宣撫諸路臣一介賤微寵榮超躡有踰涯分今者又蒙益臣軍馬使濟恢圖臣實何人誤辱神聖之知如此敢不晝度夜思以圖報稱臣揣敵情所以立劉豫於河南而付之齊秦之地蓋欲荼毒中原生靈以中原而攻中原粘罕因得休兵養馬觀釁乘隙包藏不淺臣不及此時稟陛下睿算妙畧以伐其謀使劉豫父子隔絕五路叛將還歸兩河故地漸復則金賊詭計日生它時浸益難圖臣愚欲望陛下假臣日月勿復拘臣淹速使敵莫測

臣舉措萬一得便可入則提兵直趨京洛據河陽陝府潼關以號召五路叛將則劉豫必捨汴都而走河北京畿陝右可以盡復至京東諸郡陛下付之韓世忠張俊亦可使下臣然後分兵濬滑經畧兩河劉豫父子斷可成擒如此則金賊有破滅之理爲陛下社稷長久無窮之計實在此舉假令汝穎陳蔡堅壁清野高於號洛分屯要害進或無糧可因攻或難於餽運臣須斂兵還保上流賊定追襲而南臣俟其來當率諸將或挫其銳或待其疲賊利速戰不得所欲勢必復還臣當設伏邀其歸路小入則小勝大入則大



勝然後徐謀再舉。設若賊見上流進兵，併力來侵。淮上或分兵攻犯四川，臣卽長驅擣其巢穴。賊困於奔命，勢窮力殫。縱今年未盡平殄，來歲必得所欲。亦不過一二年間，可以盡復故地。陛下還歸舊京，或進都襄陽關中，惟陛下所擇也。臣聞興師十萬，日費千金。邦內騷動，七十萬家。此豈細事。然古者命將出師，民不再役，糧不再籍。蓋慮周而用足也。今臣部曲遠在上流，去朝廷數千里。平時每有糧食不足之憂。是以去秋臣兵深入陝洛，而在寨卒伍有飢餓閃走。故臣急還，不遂前功。致使戰地陷僞，忠義之人旋被屠殺。

皆臣之罪。今日唯賴陛下戒勅有司，廣爲儲備。俾臣得一意靜慮，不爲兵食亂其方寸。則謀定計審，仰遵陛下成筭，必能濟此大事也。異時迎還太上皇帝、崇德皇后梓宮，奉邀天眷歸國，使宗廟再安，萬姓同歡。陛下高枕無北顧憂。臣之志願畢矣。然後乞身還田里。此臣夙昔所自許者。伏惟陛下恕臣狂易，臣無任戰汗取進取。

乞本軍進討劉豫劄

逆豫通誅，尚穴中土。陵寢乏祀，皇圖偏安。六飛時巡，越在海際。天下之愚夫愚婦，莫不疾首痛心，願得伸



鏘奮挺以致死於敵而陛下審重此舉累年于茲雖嘗分命將臣鼎峙江漢僅令自守以待敵不敢遠攻而求勝是以天下忠憤之氣日以沮喪中原來蘓之望日以衰息歲月益久汗染漸深趨向一背不復可以轉移此其利害誠爲易見臣待罪闕外不能宣國威靈克殄小醜致神州隔於王化虜僞穴於官闕死有餘罪敢逃司敗之誅陛下比者寢閣之命咸謂聖斷已堅何至今日尚未決策非向臣願因此時上稟睿筭不煩濟師止以本軍進討庶少塞鯨官之咎以成陛下審寐中興之志順天之道因民之情以曲直

爲老壯以順逆爲強弱萬全之效茲焉可必惟陛下力斷而行之不勝大願

乞進屯淮甸劄

伏覩陛下移蹕建康將遂恢圖之計近忽傳淮西軍馬潰叛鄺瓊等進脅軍民而去然事出倉卒實非士衆本心亦聞半道逃歸人數不少於國計未有所損不足上軫淵衷臣度今日事必彼未能便有舉動襄陽上流目卽亦無賊馬侵犯唯是淮甸迫近行在臣願提全軍進屯萬一叛僞窺伺臣當竭力奮擊期於破滅仍乞別遣軍馬措置襄陽一帶伏乞睿斷詳酌

進志通記



施行

乞乘機進兵劄

金賊近累敗衄其虜酋四太子等令老小渡河惟是賊衆尚徘徊於京城南壁一帶近却發八千人過河北此正是陛下中興之機乃金賊必亡之日若不乘機殄滅恐貽後患伏望速降指揮令諸路之兵火急並進庶幾早見成功

乞移都奏畧

錢塘僻在海隅非用武之地臣請陛下建都上游用漢光武故事親率六軍往來督戰庶將士知聖意之

所向人人用命臣當仗國威靈鼓行而前殄滅此虜則中興之功即日可冀

論虜情奏畧

金虜自靖康以來以和款我者十餘年矣不悟其詐受禍至此今復無事請和此殆必有肘腋之虞未能攻犯邊境又劉豫初廢藩籬空虛故詭出此耳名以地歸我然實寄之也臣請量帶輕騎隨一使祇謁陵寢因以往觀敵釁取進止

乞定儲嗣奏畧

今欲恢復必先正國本以安人心然後陛下不常厥



居以示無忘復讎之意

乞止班師詔奏畧

契勘金賊重兵盡聚東京屢經敗衄銳氣沮喪內外震駭聞之謀者虜欲棄其輜重疾走渡河况今豪桀嚮風士卒用命天時人事強弱已見功及垂成時不再來機難輕失臣日夜料之熟矣惟陛下圖之

乞以明堂恩補張所男宗本奏

竊見張俊例初除太尉陳乞奏薦男于文資內安排臣技能蔑取勲伐無聞遭際聖明承乏將帥伏念臣昨於建炎初因上書論事罪廢偶幸逃死實出聖造

于此孤子一身狼狽羈旅因招撫使張所一見與臣言兩河燕雲利害適偶契合臣自白身借補修武郎閣門宣贊舍人充中軍統領尋又陞統制其後張所軍次北京蒙朝廷貶責南方卒以節死臣念靖康以來奮不顧身為國捍難者不為無人而其間誤國敗事者固亦不乏然聖恩寬大終於一切矜貸若張所先意兩河而身未北渡已遭橫議今其身命凋喪零落使臣不言臣則有負欲望矜憐將臣今歲奏薦恩例奏補張所男宗本依張俊例於文資內安排謹錄奏聞



辭鎮南軍承宣使第二奏

榮命下頒，驚魂頓失。辭章上達，帝命不俞。雖臣受之不慙，恐輿情之未協。輒陳懇悃，方切憂惶。復蒙天語之丁寧，告戒備至。愈使臣心之感戴，進退靡安。敢事虛辭，仰違明詔。竊念臣將天威而遠討，致賊巢之一空。妙策竒謀，悉遵聖訓。破堅却敵，咸得士心。臣實何能，輒膺殊賞。既慙過量，復附重權。是誠冒叨以踰勲，非謂謙辭而避寵。况九江乃控扼之重地，連武昌爲襟帶之要衝。用得其人，周瑜所以敗曹公於赤壁。禦失其策，隋何所以取黥布於滢江。難使非才濫膺此

寄。伏望吝此嚙喉之附，以屬大臣俯從螻蟻之誠。使安愚分，所有上件恩命，乞賜寢罷。干冒天威，死有餘罪。謹錄奏聞，伏候勅旨。

乞侍親疾劄

臣輒具危懇，仰瀆睿聰。臣愚贛之迹，奮身單微。初無尺寸之先容，獨賴聖明之特眷。雖捐身致命，曾不足以仰酬恩遇之絲毫。思報之心，寧有窮已。臣近者奉命收復襄漢，去家遠涉，六月餘日。臣老母姚氏年幾七十，侵染疾病，連月未安。近復腿脚注痛，起止艱難。別無兼侍，以奉湯藥。人子之心，實難安處。伏望聖慈



岳忠武王集  
察臣悃悞無佗規避暫乞許臣在假以全侍奉之養將本軍人馬權暫令統制官王貴張憲主管候臣老母稍安依舊管幹職事恭聽驅策結草銜環誓圖報效冒犯雷霆之威臣無任戰懼激切之至取進止

辭建節第四劄

念臣猥以不才幸蒙委使敢謂涓埃之效遽叨旌節之榮若不屢辭干瀆天聽不惟叨冒寵榮不遑安處方今戎馬侵擾而誤恩若加於人深慮名器不重勸賞不實何以厭服公議臣雖三貢丹誠宸衷未允敢望聖慈察臣之愚實非矯飾所有告命見在鄂州軍

資庫寄納伏乞特賜却還以安愚分取進取

乞終制劄

伏念臣孤賤之迹幼失所怙鞠育訓導皆自臣母國家平燕雲之初臣方束髮從事軍旅誓期盡瘁不知有家自從陛下渡河以來而臣母淪陷河朔凡遣人一十八次始能般挈得脫虜禍驚悸至疾遂以纏綿臣以身服戎事未嘗一日獲侍親側躬致湯藥之奉今者遭此大難荼毒哀苦每加追念輒欲無生而陛下恩眷有加即命起復在臣么微固深銜戴然臣重念爲人之子生不能致菽水之歡死不能終衰絰之



制面顏有覲天地不容且以孝移忠事有本末若內不克盡事親之道外豈復有愛主之忠臣已般挈扶前來欲於江州或南康郡界營葬伏望聖慈矜餘生許終服制取進止

辭開府劄子貼黃

臣待罪一府理有當言不敢緘默夫虜情奸詐臣於面對已嘗奏陳切惟今日之事可危而不可安可憂而不可賀可以訓兵飾士謹備不虞而不可以行賞論功取笑夷狄事關國政不容不陳初非立異於衆人實欲盡忠於王室欲望速行追寢示四夷以不可

萬一臣冒昧而測之意將來虜寇叛盟則似傷朝廷之體仍望以此貼黃留中不出保全臣子臣不勝至情伏乞睿照

辭開府第三劄

近者累犯天威力辭恩寵庶幾陛下燭危懇終賜矜從而溫詔諄諄未回睿聽跼地籲天不知所措夫爵賞者人君所以爲厲世磨鈍之具人臣得之所以榮耀鄉里而顯貴宗族也誰不欲貪多而務得哉然得所當得固以爲榮受所非受反足爲辱伏念臣奮迹羈單被恩優腆使臣終身只守此官已踰涯量豈



可分外更冒顯榮遂速顛濟雖陛下推天地至寬之  
量在所兼容而微臣抱金石圖報之心寧無自愧所  
有臣爲將不效獻言悖理之實臣於累奏中固已縷  
陳更不敢諄復紊煩聖聽伏望陛下檢會臣累次劄  
子追寢成命特降俞音庶使微臣少安愚分

辭開府第四劄

臣已三貢辭章出於誠悃冒犯天威罪不容赦聖恩  
廣大一賜溫詔兩降劄命捫心揣分感極涕零伏念  
臣草茅固陋備數戎行曾無尺寸之功仰報天地之  
德竊以開府之位實預孤卿之貴所以賞有功而進

豪傑也如臣何人輒膺斯秩是以心不自安終難冒  
受不避譴誅再伸前懇非敢徒爲辭遜伏望聖慈矜  
察愚衷收還成命庶令臣少安愚分臣不勝虔祈俟  
命之至取進止

辭宣撫副使劄

臣近叨受招討使不容牢辭又蒙聖恩授以前件差  
遣切念臣一介寒賤誤膺器使顧土宇恢復之迹未  
見尺寸而厚恩醲賞涯分已踰且以宣撫之重命實  
寄專征之大事自非廊廟近臣勲伐高世者豈當冒  
躡而居異時附託失人或誤驅策雖粉臣骨曷足以



謝陛下兼招討使權不爲不重若更加以甚高非常之寵必起負乘斯奪之悔所有宣撫副使恩命實難祇受伏望追寢誤恩庶安愚分臣無任悚懼恭聽宸命之至取進止

乞解軍務第二劄

臣頃以多病易衰仰瀆宸聽乞退處丘壠以便養病伏蒙陛下未忍棄去尚闕命音不免控瀝肺腑再攄悃悞今賢能輩出才智駢臻干城心腹之士可附以軍旅者類不乏人則臣之所請無邀君之嫌今講好已定兩宮天眷不日可還偃武休兵可期歲月臣之

所請無避事之謗臣不揆庸愚幸免此二事止以疾病餘生恐誤任使久享厚祿坐費太倉蚤夜以思身不遑處所以不避鈇鉞至于再不己伏望陛下垂溥照之明回蓋高之聽曲加仁惻洞照愚衷使一夫之微終遂其欲特許退休就營鑿藥

辭男雲特轉三官劄

臣聞君之馭臣固不吝於厚賞父之教子豈可責以近功臣昨恭依睿筭與賊決戰於陳穎之間雲隨行迎敵雖有薄效殊未曾立到大功遽超橫列仍領群防賞典過優義不遑處所有誥命臣不敢令雲祇受

到字志誤



伏望聖慈俯垂天鑒、追還異恩、庶使雲激厲懦庸、別圖報效、取進止

辭男雲轉三官第二劄

伏念臣本以凡材、誤蒙陛下附以方面、若臣不能與士卒一律、則亦不能整齊其心、昨者之戰、士卒冒犯矢石、有斬將陷陣、立奇功者、臣方列上事狀、得霑一級、而男雲何從超進崇資、正恐士卒有無功之謗、陛下致濫予之譏、且陛下方謹惜名器、以磨勵天下、將昭復大業、而乃因臣私恩、廢公議、臣不自安、伏望聖慈特降睿旨、收還上件恩命、臣父子幸甚、取進止

辭男雲特轉恩命劄

臣聞惟名與器、不可以假人、故循守資格、自有常法、必有非常之功、而後有非常之賞、如臣男雲、始就義方、尚存乳臭、雖累經於行陣、曾未見於事功、比者仰蒙聖恩、曲垂異眷、超資躡等、驟進官聯、不惟使雲志氣怠惰、而臣益切滿盈之愧、况臣既已仰竊國恩、致身顯仕、固有僥冒之名矣、今併與其子、而僥冒其可乎、伏望陛下揭離照之明、體軋健之斷、特賜睿旨、追還告命、庶使雲粗知官爵之難得、勉力學業、他日或能備效驅策、受之未晚、取進止



辭男雲特轉恩命第二劄

臣聞正己然後可以正物，自治然後可以治人。臣奮身踈迹，冒國寵榮。陛下誤恩，擢置重任，以辱陋之資，將軍旅之衆。顧惟匪稱，夙夜惶懼，惟恐檢飭修省，有所未至，不足以服衆。比者男雲未嘗立功，遽遷優秩。在臣私分，實不遑處。臣懦無能，方將勉竭駑鈍，仰圖報稱。而自使其子受無功之賞，則是臣不能正己而自治。將何以率人哉？伏望陛下憐臣拙直，察臣愚衷，早賜俞音，收還成命。容臣男他日更立戰功，然後命之以官，亦未爲晚。所有官造一軸，除已令本司簽廳

牒鄂州於軍資庫內寄納取進取

辭少保第三劄

臣聞忠臣之事君，計功而受賞，量力而受官，不爲苟得。以貪爵祿，况師旅方興，事功未著，臣方同士卒之甘苦，明將佐以恩威，冀成尺寸之功，仰報君父之德。豈可身被厚寵，而愆然不以當鋒刃，冒矢石者爲心哉？所有少保恩命，臣實不敢祇受。伏望陛下日月照臨，乾坤覆載，察臣肺腑，追寢異恩。臣願憑陛下雷霆之威，託宗廟山嶽之福，罄竭駑鈍，期效涓埃。候將來功績有成，臣將拜手稽首，祇承休命矣。誠懇迫切，至



於再三干瀆天威，臣不任戰悸惶懼之至，取進止。

辭少保第四劄

臣聞爵以馭其貴，祿以馭其富。爵祿者，人君馭天下英豪而使之貴富也。人孰不欣受而願享之，然名器假人爲傳所譏，無功受祿爲詩所刺，則君不可以輕予，臣不可以妄受。臣性資樸魯，久叨寵榮，每懼滿盈，弗克負荷。况乃孤卿實爲異恩，若更無功，輒有貪冒。臣職分謏薄，竊恐別招譴責，伏望陛下憐臣勤懇，特降俞音，追還恩命，庶使臣稍安愚分，別效寸長，仰報陛下天地生成之德。干冒鈇鉞，伏候勅旨。

辭少保第五劄

臣之事君，義無有己。若夫貪慕爵祿，務榮一身，而不以國家爲念，則非臣之所忍爲也。比者羯胡敗盟，再犯河南之地，肆爲殘忍，人神共憤。臣方將策駑礪鈍，冀效尺寸，以報陛下天地生成之德。今則虜騎寇邊，未見殄滅，區區之志，未效一二。臣復以身爲謀，惟貪爵祿，則誠恐不足爲將士之勸，而報恩無所，萬誅何贖。伏望睿慈，追寢成命，特賜俞音，姑詔有司，留以爲異時涓埃之賞，取進止。

辭男雲除御帶第二劄



竊以御帶之職至近冕旒非有干城之才可以任腹  
心之寄者不足以當其選臣男雲年少蠢愚殊未練  
達世務一旦驟遷此職實非駉幼所能陛下爲官擇  
人豈當出此知子者父誠不遑安不免披露愚誠再  
干天聽

乞叙立王次翁下第二劄

臣契勘參政與樞副叙位朝廷自有定例豈可爲臣  
忝竊孤卿叙位使在參知政事之上不免再具誠懇  
仰瀆聖聽伏望睿慈曲垂照鑒許臣只依近例叙位  
在參知政事之下庶使庸愚不致僭越取進止

乞解樞柄第三劄

露章待罪自驚寵數之過優溫詔示恩猶闕命音之  
下逮再陳愚懇仰瀆淵聰伏念臣濫厠樞庭誤陪國  
論貪榮滋甚補報蔑然豈惟曠職之可憂抑亦妨賢  
之是懼冀保全於終始宜遠引於山林伏望聖慈察  
其誠心實非矯飾速降睿旨許罷機政取進止

辭除兩鎮充萬壽觀使第二劄

竊以兩鎮節旄國朝盛典非有大勳豈容輕授臣前  
此叨據常懼弗稱自惟智術短淺坐糜歲月攷其績  
用初無絲毫安可更再冒榮矧內祠之任得侍清光



朝廷所以貴老尊賢用昭異數在臣愚分非所宜處顧待遇之愈隆夙夜以思雖粉身碎骨何以圖報萬一愧深汗溢感極涕橫重念臣才踈德薄人微望輕若不自列濫當優寵必致顛隳上孤宸眷欲望聖慈追寢成命除臣一在外宮觀差遣取進止

謝講和赦表

臣岳飛上表言今月十二日准進奏院遞到赦書一道臣已即躬率統制領將佐官屬等望闕宣讀訖觀時制變仰聖哲之宏規善勝不爭實帝王之妙筭念此艱難之久姑從和好之宜睿澤誕敷輿情胥悅臣

飛誠懼誠忤稽首頓首竊以婁敬獻言於漢帝魏絳發策於晉公皆盟墨未乾顧軟血猶濕俄驅南牧之馬旋興北伐之師蓋夷虜不情犬羊無信莫守金石之約難充谿壑之求圖暫安而解倒垂猶之可也顧長慮而尊中國豈其然乎恭惟皇帝陛下大德有容神武不殺體軋之健行巽之順務和衆以安民乃講信而修睦已漸還於境土想喜見其威儀臣幸遇明時獲觀明時身居將闔功無補於涓埃口誦詔書面有慙於軍旅尚作聰明而過慮徒懷猶豫以致疑謂無事而請和者謀恐卑辭而益幣者進臣願定謀於



全勝期收地於兩河唾手燕雲終欲復讎而報國誓  
心天地當令誓類以稱藩

奉詔移偽齊檄

契勘偽齊僭號竊據汴都舊忝臺臣累蒙任使是宜  
執節效死圖報國恩乃敢背棄君父無天而行以祖  
宗涵養之澤翻爲讎怨率中華禮義之俗甘事腥羶  
紫色餘分擬亂正統想其面目何以臨人方且妄圖  
襄漢之行欲窺川蜀之路專犯不韙自速誅夷我國  
家厄運已銷中興在即天時既順人意悉諧所在皆  
賈勇之夫思共快不平之忿今王師已盡壓淮泗東

過海沂驛騎交馳羽檄疊至故我得兼收南陽智謀  
之士提大河忠孝之人仗義以行乘時而動金洋之  
兵出其西荆湖之師繼其後雖同心一德足以吞彼  
國之梟然三令五申豈忍殘吾宋之赤子爾應陷沒  
州縣官吏兵民等元非本意諒皆脅從屈於賊威歸  
逃無路我今奉辭伐罪抹溺蘇枯惟務安集秋毫無  
犯倘能開誠納款肉袒迎降或願倒戈以前驅或列  
壺漿而在道自應悉仍舊貫不改職業盡除戎索咸  
用漢條如或執迷不悟甘爲叛人嗾桀犬以吠堯豈  
獵師而哭虎議當躬行天罰玉石俱焚禍並宗親辱



及父祖掛今日之逆黨遺千載之惡名順逆二途蚤  
宜擇處兵戈既逼雖悔何追謹連黃榜在前各令知  
悉

御書屯田三事跋

臣聞先正司馬光有言德勝才謂之君子才勝德謂  
之小人論人者能審於才德之分則無失人矣曹操  
募百姓屯田許下所在積粟諸葛亮分兵屯田而百  
姓安堵羊祜懷遠近得江漢之心亦以懇田獲利若  
三子者重本務農使兵無難食其謀猷術略皆不在  
人下才有足稱者然操酷虐變詐孽申商之法術雖

號超世之傑豈正直中和者所爲乎許劭謂清平之  
奸賊亂世之英雄其德有貶云亮開誠心布公道邦  
域之內畏而愛之祜增修德言以懷柔初附則德過  
操遠矣觀亮素志欲龍驤虎視包括四海以興漢室  
天不假以年遽有渭南之恨祜輔晉武慨然有并吞  
之心後平吳祜不及見二子有意于功名而志弗克  
伸惜哉臣庸德薄才誠不敢妄論古人伏蒙陛下親  
灑宸翰鋪述三子屯田足食之事俯以賜臣臣敢不  
策駑礪鈍仰副聖意萬一夫服田力穡乃亦有秋農  
夫職爾用屯田以足兵食誠不爲難臣不揆願遲之



古忠武王集  
歲月敢以奉詔，要使忠信以進德，不爲君子之棄。則臣將勉其所不逮焉。若夫鞭撻四夷，尊強中國，扶宗社於再安，輔成明天子，以享萬世無疆之休，臣竊有區區之志，不知得申歟否也。紹興十年正月初一日，武勝定國軍節度使開府儀同三司湖北路宣撫使兼營田大使武昌郡開國公食邑四千戶實封一千七百戶臣岳飛謹書

申劉光世乞進兵狀

竊念飛以行伍賤隸，辱知朝廷，蒙被厚恩，殞歿難報。每以爲國家之難，雖非所命，猶當戮力，矧承楚之事。

危迫如許，累准朝廷指揮催督。此正飛等捐身殉義之秋。切緣王鎮撫林郭鎮撫仲威等，並不見差撥軍馬前來。使司王統制雖聞已起發，即日尚未知屯駐去處。探虜人急攻楚州，切恐萬一踈虞於淮南諸鎮，利害不細。飛已於今月十五日具申使司去訖。飛一面起發前往承州措置，勦殺外伏，乞鈞慈特捐一二千之衆，別差總統制官一員前來犄角，庶不致上誤國事。謹具狀申，伏候指揮。

申劉光世乞兵馬糧食狀

飛昨奉聖旨指揮，差充前件差遣。於八月十五日還



至常州宜興縣于十八日起發前來祇赴新任二十  
二日至江州軍歇泊據探報金人見圍楚州飛遂速  
急權差統制王貴管押馬兵等船濟渡切慮遲滯有  
失事機不免躬親先入泰州於二十六日夜三更到  
泰州城外承准八月十九日指揮令飛與趙鎮撫立  
犄角飛遂措置調發糧食兵夫并不住差人勾喚王  
貴等軍馬實緣舟船數少今月初九日方盡到泰州  
飛已差張憲權行守城見今大軍屯駐三光宗皇帝嫌諱與  
金人大塞不遠惟是新復建康之後所有士馬瘡痍  
尚新羸弊方甚兼自到任未及一旬芻糒糗糧一一

窘之本未能即從王事重以楚承之急甚於倒垂不  
可以頃刻安居理宜前進鈞慈欲望捐一二千之衆  
假十餘口之糧令飛得激厲士卒徑赴賊壘解三州  
之圍掃犬羊之迹下以禪相公之盛烈上以寬主上  
之深憂不勝幸甚

五嶽祠盟題記

自中原板蕩夷狄交侵余發憤河朔起自相臺結髮  
從軍歷二百餘戰雖未能遠入夷荒洗蕩巢穴亦且  
快國讎之萬一今又提一旅孤軍振起宜興建康之  
城一鼓敗虜恨未能使匹馬不回耳故且養兵休卒



畜銳待敵，嗣當激厲士卒，功期再戰，北踰沙漠，蹀血虜廷，盡屠夷種，迎二聖歸京闕，取故地上版圖，朝廷無虞，主上奠枕，余之願也。河朔岳飛題。

題廣德軍金沙寺壁

余駐大兵，宜興沿幹王事，過此陪僧僚，謁金仙，徘徊暫憩，遂擁鐵騎千餘，長驅而往，俟當立奇功，殄醜虜，復三關，迎二聖，使宗朝再振，中國安疆，他時過此，得勒金石，不勝快哉。建炎四年四月十二日，河朔岳飛題。

題東松寺

余自江陰軍，提兵起發，前趣饒郡，與張招討會合，崎嶇山路，殆及千里，過祁門西，約一舍餘，當途有庵一所，問其僧曰：東松，遂邀後軍王團練，并幕屬隨嬉焉。觀其基址，乃鑿山開地，創立廟廡，三山環聳，勢凌碧落，萬木森鬱，密掩烟薨，勝景瀟灑，實為可愛。所恨不能款曲，進程過速，俟他日殄滅盜賊，凱旋回歸，復得至此，即當聊結善緣，以慰安庵僧。紹興改元仲春十有四日，河朔岳飛題。

題永州祁陽縣大營驛

權湖南師岳飛被旨討賊曹成，自桂嶺平蕩，巢穴二



廣湖湘悉皆安妥，痛念二聖遠狩沙漠，天下靡寧，誓  
竭忠孝，賴社稷威靈，君相賢聖，他日掃清胡虜，復歸  
故國，迎兩官還朝，寬天子宵旰之憂，此所志也。顧蜂  
蟻之群，豈足爲功，過此因留于壁。紹興二年七月初  
七日

題鄱陽巍石山寺

巍石山前寺，林泉勝景幽。紫金諸佛相，白雪老僧頭。  
潭水寒生月，松風夜帶秋。我來屬龍語，爲爾濟民憂。  
從駕遊西內，應制

敕報遊西內，春光霽上林。花團千朶錦，柳撚萬條金。

燕邀龍旗舞，鶯隨鳳輦吟。君王卽天地，化育一仁心。

送紫巖張先生北伐

號令風霆迅，天聲動北陬。長驅渡河洛，直擣向燕幽。  
馬蹀閼氏血，旗臬克汗頭。歸來報明主，恢復舊神州。  
翠光亭

題翠巖寺

愛此倚欄干，誰同寓目間。輕陰晴弄日，秀色隱空山。  
鳥樹蕭颼外，征帆杳靄間。予雖江上老，心羨白雲關。  
秋風江上駐王師，暫向雲山躡翠微。忠義必期清塞  
水，功名直欲鎮邊圻。山林嘯聚何勞取，沙漠羣兇定



破機行復三關還一聖金酋席卷盡擒歸

寄浮圖慧海

湓浦廬山幾度秋長江萬折向東流男兒立志扶王室聖主專師滅虜酋功業要刊燕石上歸休終伴赤松遊丁寧寄語東林老蓮社從今着力脩

池州翠微亭

經年塵土滿征衣特特尋芳上翠微好水好山看不足馬蹄催趁月明歸

題新淦蕭寺壁

雄氣堂堂貫斗牛誓將直節報君讎斬除頑惡還車

駕不問登壇萬戶侯

金山寺

第一泉頭過九日黃花猶待客重來男兒有意扶中國不斬樓蘭不易回

滿江紅

怒髮衝冠凭欄處蕭蕭雨歇擡望眼仰天長嘯壯懷激烈三十功名塵與土八千里路雲和月莫等閑白了少年頭空悲切靖康耻猶未雪臣子恨何時滅駕長車蹈破賀蘭山缺壯志飢餐胡虜肉笑談渴飲匈奴血待從頭收拾舊山河朝天闕



小重山

昨夜寒蛩不住鳴，驚回千里夢。已三更，起來獨自遶階行。人悄悄，簾外月籠明。白首為功名，舊山松竹老，阻歸程。欲將心事付瑤琴，知音少。絃斷有誰聽。

岳忠武王集終


文久三癸亥季春鐫

領行書林

江戸横山町三丁目

和泉屋金石衛門





文久三癸亥季春籙  
味泉堂金谷翰門  
出天齋山四三丁目



1106



